

東  
城  
雜  
記



2133

東  
城  
雜  
記

厲  
鶚  
撰

中  
華  
書  
局

叢書集成初編

東城雜記

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之一

統一書號：一七〇一八·一五一

東城雜記

此據粵雅堂叢書  
本排印初編各叢  
書僅有此本

吾杭會城之東。遮列雉而栽宇者。幽棲地僻。學圃以悅生。紫茄白苧。青菘赤甲之屬。綠畦被架。貫四時而  
恆春。魚陂下石。依梅水爲盈縮。不種自饒。居民勤織作縲。車緯雙接響連檐。與耳謀者。若水激之滄溟。鼎  
沸矣。賈區所聚。亦有牛醫馬磨。販脂賣履。吹簫織蓆。芘芘之輩。盍置其閒。俗儉而風茂美。以故蟬蛻泥滓  
者。擇地高蹈。恆窟棲焉。鑿坏爲門。把茅蓋屋。攬水竹以清心魂。謝影纓而回俗駕。蓄牀煨火。諷詠內書。輒  
障施厨。咀嚼道味。同塵采真。此其選也。亦有國老引年。依風繩谷。洛社高著英之名。梁書期止足之傳。折  
齒效其步趨。小冠別爲風尚。後賢尋白雲之堂。歸路是樵風之徑。流風未沫。陳迹履綦。更有名詮鉤黨。人  
目清流。汝穎仰月旦之品題。黟歙結桃源之會課。墨兵乍灑。筆陣橫飛。詩則臞軒著評。書則懷瓘估文。  
則彥和程材。畫則洪谷傳法。醉鄉遵皇甫之科條。茗酪藉伯審所辨記。斯誠離騷之博徒。藝苑之別子矣。  
抑匪特與寄遠也。蓋亦有禪悅焉。赤華雞棲。青豆蜂宿。胸衣交臂。齋版倦聽。借禪榻以驗鬢絲。拈餅花而  
參密旨。千函榆檣。信地繙經。一握松枝。彌天選佛。真可以破除結習。淬練智光。號此樂邦。洵非妄爾。吾友  
樊榭山人。業茲者蓋二世矣。延年鄰芳菊之谿。名士住青楊之巷。溯沿往事。特剞一編。指形勝於漢東。讓  
西。敘土物於舍南。舍北。搜遺采隱。抑揚寸心。比城南之紀遊。揭東園之友說。蓋今世之耐得翁。癸辛老人  
也。昔罔稱紀。載陳留周處。掌錄陽羨。遠則根括四境。近猶敘說一州。若其撮舉方隅。瑣陳街陌。言不滿萬。  
體兼數家。譬之秦中歲時。嶺南異物。襄陽者舊。益州名畫。洛陽伽藍。吳興園圃。合爲一書。各臻厥美。求之  
簿錄。古無其倫。不佞屢借客座。提耳舊聞。研京練都。殆將一紀。而是書乃克寓目。信乎艱矣。因條其大槩。

東城雜記 杭序

而序述之如此。薰浦杭世駿。

杭城東曰東園。地饒水竹。蔬蕪。儻然清遠。先君子因家焉。小子生於是居。已三十餘年。凡五遷。未嘗離斯地也。每欲攷里中舊聞遺事。而志乘所述。寥寥無幾。鄰翁野叟。拙樸無可與語者。因從故籍參稽。每有所得。輒彙錄之。又於交朋質問。得復一二。雖見聞陜隘。或遇嘉客見臨。聊舉爲茗盃閒談資爾。或曰。古杭事甚繁。何不推廣成書。而區區方隅爲笑。應之曰。姑有待。雍正六年春三月十有二日。樊榭山民厲鶚書於野人舟。

東城雜記二卷。錢塘厲徵君鶚撰。徵君與先本生曾大父魚亭公友善。每一書成。輒就商可否。是以著述手彙多藏余家。是書爲未定之本。其中塗乙添註。較外間傳鈔者。頗有增益。所載東里文獻。足補志乘所未備。爰略加詮次。付之剞劂。末學誦陋。恐校勘未能盡善。尙望博雅君子。匡其不逮焉。嘉慶庚辰夏五。里後學汪遠孫識。



右東城雜記二卷。國朝厲鶚撰。按鶚字太鴻，號樊榭，錢塘人。乾隆元年薦舉博學鴻詞，著有樊榭山房集。遼史拾遺、宋詩紀事及是書四庫提要均已著錄。全謝山鮎埼亭集稱先生於書無所不窺，故其詩多有異聞軼事，爲人所不及知者。李穆堂閣學湯西厓侍郎激賞焉。錢塘詩社以爲職志方賴主持之云云。王蘭泉蒲褐山房詩話稱先生讀書搜奇愛博，鉤新摘異尤熟於宋元以來叢書稗說。馬氏小玲瓏山館多藏舊書善本，因得端居探討，故所撰極爲詳洽。云云提要亦稱其博洽羣書，吐屬嫺雅，有修潔自喜之致。云云其推挹之者，卽以移弁此書。洵無愧色。卷首有杭大宗序，極濶雅，其詞科掌錄稱是科徵士中，吾石友三人，皆據天下之最。太鴻之詩，稚威之古文，謝山之考證，求之近代罕有倫比，而皆不得在詞館，豈非命哉。蒲褐山房詩話又稱先生無子，葬於西溪，後四十餘年，何春渚游西溪，見田舍草堆中，先生及姬人月上粟主在焉，偕同人送武林門外黃山谷祠，酒壚一室供之，忌日薦酒脯焉。吳穀人駢體文續集復有公置先生墓田碑記，固天道之難問，而諸君子之高義，亦可風矣。道光庚戌寒食令節，南海伍崇曜謹跋。

東坡雜記目錄

卷上

四十六條

卷下

四十九條

# 東城雜記卷上

永壽寺

清 錢塘厲 鶚太鴻撰

寺在慶春、艮山、二門城隅之間。四面皆菜畦野沼。舊名永壽庵。爲南海普濟寺下院。康熙四十三年。聖祖仁皇帝南巡。賜御書額永壽寺。

富景園

武林城東曰東園者。宋御園也。至淮張展城後。迤東十里許。民居甚鮮。多爲池塘畦棧。因槩以東園名。鄉先輩或云宋東苑。似未得其詳。按宋史孝宗紀。乾道七年秋。九月甲午。從太上皇帝。太上皇后。幸東園。光宗紀。紹興五年。夏四月。壽聖皇帝幸東園。葉紹翁四朝聞見錄。孝宗內禪光皇。實憲聖所命。孝宗遂得日奉長樂。極天下之養。北宮去東園最近。旬浹閒。卽請憲聖臨幸。屬芙蓉臨池秀發。遂白憲聖。請登龍舟。撤去闌幕。臥看尤佳。憲聖欣然從之。潛說友咸淳臨安志。富景園。在新門外之東。孝宗奉憲聖太后。嘗請遊幸。又重於數戒有司。故營是園。以邇北宮。規置略倣湖山。今亦湮廢。悉隸慈元殿歲收花果之入焉。吳自牧夢梁錄。城東新門外東御園。卽富景園。四水潛夫武林舊事。富景園新門外。俗呼東花園。灌圃耐得翁都城紀勝。城東新開門外東御園。今名富景園。王士點禁篇。園有集芳。慶樂。聚景。玉津。玉壺。富景。翠芳。竝

在杭。以上諸書班班可考。所云新門。明代名永昌。本朝以其同閩賊僞年號。改曰望江。俗稱草橋門。內地里人尚呼園前街者是已。郎瑛七修類稿云。東花園。宋之富景園也。內有百花池。今園前民家尚存大池。相傳舊矣。臨安志又云。昇仙橋。富景園前。南新草橋。富景園東。今望江門內。護國禪院前。有小橋。不通舟楫。俗呼爲等仙橋。卽昇仙橋也。近山陰許右文尚質寓杭雜詠云。富景園開曲巷東。風光直與玉津同。百花池上頻移艇。閒殺江南垂釣翁。述古可謂詳核矣。又平湖沈遐庵修齡有經富景園故址。調寄摸魚兒詞云。過城東。版兒巷口。斜陽催送殘景。空園喬木無情物。不帶昭陽鴉影。還記省。奈回首。花天月地和煙暝。鶻聲颯盡。問淺碧荒池。淡黃疏柳。閒話不堪聽。銅駝裏。誰惜枝枝紅杏。昇仙橋外。西映繁華。已作浮雲散。幾度春風消領。闌曲凭。數檢校。垂旒彈指三生頃。昆明劫冷。看漢苑螿飛。蘇臺鹿走。喚起夢鷗醒。予亦有過富景園故址。調寄臺城路詞云。生平落拓東城下。谿雲素心都負。迹似潛夫。身如灌圃。只記南朝衰柳。牆根井口。抱一片晴沙。眼波微溜。縱不關愁。露桃愁到不言後。探春那回行徧冷。餽猶未賣。人尙中酒。藏謎花樓。戲嬰水館。別有凭闌紅袖。新煙信否。過幾度酸風。翠梢眉鬪。佇立誰知。暝鴉飛去久。

遊東園啓

諸虎男匡鼎。招王丹麓。踰遊東園啓云。比鄰看竹。本學士之清懷。攜客登山。亦達人之高致。城東有東園焉。乃故宋之東苑也。郊外桑麻。無殊栗里。園中雞黍。不異桃源。黃花萬畝。儼竺國之鋪金。白藕千池。似崑山之積玉。翦松栽柳。抑又何求。折芰燔枯。此焉自足。沾村酒以薄醉。望明霞而可餐。持鋤野圃。竊比漢陰。

垂釣方塘。略同濮水。何必山陰道上。始歎難爲人懷。落雁峯頭。方稱呼通帝座耶。儻或傾風。幸希賁止。

宋畫院

陳仲醇繼儒妮古錄云。武林地。有號園前者。宋畫院故趾也。

程源

南渡後。程源爲伊川嫡孫。無慳殊甚。嘗鬻米於臨安新門之草橋。著爲道學正統圖。嘉定十七年。聖旨訪求伊川後。特與錄用。源補迪功郎。除二令監丞。元祐初。起伊川誥詞云。敕鄉貢進士程頤。孔子曰。舉逸民。天下之民歸心焉。吾思起草茅巖穴。以粉澤太平。而大臣以爾好學篤行。薦於朝。願得試用。故加以齋命。起爾爲洛人矜式。此故事也。盛名之下。尙謹處哉。紹興元年。九月二日。敕通直郎程頤。朕惟周衰。聖人之道。不得其傳。世之學者。違道以趨利。舍己以爲人。其欲聞仁義道德之說。孰從而聽之。間有老師大儒。不事章句。不習訓傳。能自得於正心誠意之妙。則曲學阿世者。又從而排陷之。卒使流離顛寃。無所爲而死。其禍賊於斯文者。亦甚矣。爾潛心大業。無待而興者也。方退居洛師。則子弟從之者。孝弟忠信。及進侍講帷。則拂心逆指。務引其君於當道。朕錫以贊書。寵以延閣。尙其靈明。知享此哉。可特贈直龍圖閣。嘉定庚辰。徐公僑爲江東倉。跋前後二制詞曰。右伊川先生舉逸民。追贈之誥詞也。昔先生居洛。以道自任。元祐初。始應詔。未幾以開去。中興首明黨議。而先生下世矣。先生之孫源。將以二詞刻諸石。先生之道。雖不行於時。此益以見我朝崇儒重道之意。東陽徐某謹書。出葉紹翁四朝聞見錄

程源授迪功郎制

敕故左通直郎、崇政殿說書、贈朝請大夫、直龍圖閣、諡正、程頤四世孫源。朕惟道德性命之旨，具載魯論孟氏之書，關洛諸儒，講明益備，奈何頃歲，各欲專門，遂致邇來，橫生邪說，朕所以悉贈先儒之諡，并及張呂之儔，曲阜來歸，既尊崇於孔氏，元日發制，復訪後於伊川，觀之年高，廩而奉祀，源方強仕，遂命以官，庶幾感發人心，推明道統，俾務躬行之實，無爲邪說之歸，爾其懋哉，朕意深矣，可特授迪功郎，嘉定十七年六月三日，右見李秀巖心傳道命錄，觀之，伊川先生三世孫源之父也。

東臯隱者

元末東臯隱者范思賢，其先在宋時，有爲防禦使，用醫小兒名隱者，去防禦五世，其業益精，其爲醫，務利人不務利於人，名愈顯，又性至孝，壬辰之寇，抄掠市井，亟攜其母，出沒賊中，走匿湖山之叢，薄家費不顧也，所居錢塘城東，地平衍，有草木禽魚之樂，暇日輒賦詩鼓琴，圖寫山川人物以爲娛，或勸之仕，輒曰：吾不能隨世俗，俛仰不願仕也，因自稱曰：東臯隱者，作東臯隱者贊，贊曰：自昔先民，所趨靡同，或隱以爲高，或仕以爲通，惟聖有訓，卓有義方，我觀今之人，仕則以爲容，鼎以拄車，筐以植宮，鼎折斯仆，筐敗斯崩，彼曷揆曷守，上下用以蒙，有美隱君，心夷而氣沖，其行既周，其惠又以充，東臯之陽，有木鬱蔥，或偃而歌，或踞而桐，俛仰宇宙，霽胡我降，葆茲貞白，穆其清風，是用作此，以播於邦，此天台徐大章一夔，始豐類藁之文也，大章又有述德一篇，略云：予有子方晬，病勿能乳哺，吾家去思賢十里許，晨起走告之，思賢曰：子第

先往。日加午刻。吾來視之。既返。大雨如注。將午。平地流潦盈尺。吾已必其不來。既而思賢戴雨笠。被毳褐。跨款段馬。踵門索兒視。予抱兒前視之。曰。無傷也。授以七劑。曰。服是當愈。吾兒今已長大。而思賢墓有宿草。恆念之不置云云。蓋思賢隱於醫。而能以仁厚信誼存心。有古高士之風。不徒以技術著。故一時名流多投贈之作。廬陵張光弼。題范思賢東臬隱居云。海水桑田幾變遷。桃花依舊郡城邊。蔬園百畝充官稅。藥價一生供酒錢。詩句興來題綵筆。道心悟後付朱絃。院曹誰信同僚後。屈指交遊十五年。臨海陳敬初。基東臬隱者詩爲范思賢作云。錢塘隱者東臬子。讀書賣藥青門裏。云是先朝防禦孫。至今住近蒲橋市。蒲橋東頭楊柳青。門前好山終日橫。承家善起小兒疾。好古不求當世名。韓康之後誰流亞。宋清已矣無來者。世上如今市道人。紛紛見彈思鶚豕。眼明有此東臬生。百年義重黃金輕。江湖放浪詩千首。風月徘徊鶴一聲。顧子亦是忘機客。買藥青門始相識。爲君長嘯上東臬。極目千峯倚空碧。又楊廉夫維楨有吳氏歸本序云。錢塘吳觀善。字思賢。自杭之淞。謁東維先生曰。善之外高祖徐防禦氏。在宋爲小兒醫。贅堦曰范防禦氏。范無子。又贅宋四門教授吳氏子從明。字公亮。承其家而嗣其業。南渡後。自汴徙家杭之東青門。從明生德誠。提領平江醫學。德誠生仁榮。杭州路醫學錄。仁榮生四子。長卽觀善也。善通經史學。不顯工岐黃氏之書。嘗讀文正范公傳。公幼隨母適朱。而未嘗一日敢忘其本生。卒復范姓。君子反本之道也。善隨外舅氏宗於范。今將反本於吳禮也。已作堂先廬之東。名以歸本。句先生大手筆一志。庶吳氏子姓。有以知水木本源之義也。吾悼秦法子壯則出贅。世襲以爲風。父道不正。遂不子其子。而子其婿。致

宗祀不明。氏族無辨。有司詔民者。又不以盪而正之。至使一門沓著戶籍。其壞倫紀也甚矣。善能反本於徐范二宗之外。而亟歸正於吳。非謂晉達禮篤正之君子。能至是乎。□□鐵史筆之。故吾樂與之文。使後之不肖子姓。蹈秦風之鋼弊者。有所做也。夫。東維子集

癡絕生

陶南村宗儀輟耕錄。王思善釋。自號癡絕生。其先隍人居杭之新門。篤志好學。雅有才思。至正乙酉間。構李葉居仲。寓思善之東里。教授。予從永嘉李五峯先生孝光訪之。時思善在諸生中。年方十二三。已能丹青。亦解寫真。先生卽俾作一圓光小像。而部僅大如錢。而宛然無毫髮異。先生喜作文。以華之。爾後予託交於其尊人日華。遂與思善爲忘年交。思善繼得吳中顧周道遠緒言開發。益造精微。故於小像特妙。非惟貌人之形。兼得人之神氣云。郁逢慶續書畫題跋記。有楊竹西高士謙小像。嚴陵王繹寫。句吳倪瓚作松石。遂昌鄭元祐。抱遺叟楊維禎。西澗居士蘇大年。扶風馬琬。句吳高淳。東海散民錢鼎。席帽山人王逢虛。白道人茅毅。各爲贊。思善之筆。流傳於世者。殊不多見也。

海神壇

咸淳臨安志。海神壇在東青門外。太平橋之東。淳祐十二年有旨。中興以來。依海建都。宜以海神爲大祀。下太常議禮。詔守臣馬光祖。建殿望祭。自寶祐之元歲。以春秋二仲。遣從官行事。宋史樂志。有淳祐祭海神樂章十六首。是時西北地久失於金源。而祭祀猶及之。其西海位奠玉幣。潤安云。蓋高斯覆。猶隔封疆。



酌獻類安云。我秩祀典。四海一家。北海位奠玉幣。瀚安云。一視同仁。我心則怡。酌獻溥安云。惟德之涼。曷奄九州。撰詞者。不無冀望恢復之意。而國是日非。元起朔漠。未幾伯顏之師。且駐江上。海潮三日不至。神之馮依。果安在哉。今太平橋在慶春門內東河橋之東。地近城曲。平遠虛曠。望見西湖諸峯。浮螺攢黛於屋山樹杪。亦佳境也。

#### 聞子將嚴印持結社

杭州明季。先有讀書社。倡自聞孝廉子將。啓祥。張文學天生元。馮公子千秋。延年。饒嚴印持。調御忍公。武順無敕。敕後乃合於吳中。復社子將中。萬歷壬子鄉試。天啓壬戌。與嘉定李長蘅。流芳。同上公車。聞警報踵至。未及國門而返。著有自娛齋集。千秋爲具區祭酒之孫。祭酒秀水人。娶於武林沈氏。遂家焉。愛西湖之勝。築快雪堂湖上。千秋因入籍錢塘。中崇禎己卯副榜。貢入太學。歸隱秋月庵。有養鶴棗。秋月庵棗。三嚴自餘杭家錢塘。高隱不出。兄弟有作朋集。天生工書法。遺文多散逸。東里有報國院。在慶春門城隅。舊爲香林禪院。天啓初重建。仁和錢宮贊謙之受益碑記云。子與聞子將。嚴印持。諸公。結社其中。卽讀書社舊地也。復社名流。數了陽九。標榜太盛。幾罹黨禍。而數君子。蟬蛻自全。龍潛不見。多以山水禪喜爲託。比之申屠蟠。郭林宗。有足多者焉。碑有不野而望超。不出而聞寂。二語。狀境殊勝。

#### 讀書社文序

秦和蕭伯玉士璋。與聞子將最善。嘗作讀書社文序略云。山之致在煙嵐。無嵐則枯。水之致在淪漪。無漪